

## Headlines

- रेलमंत्री अश्विनी वैष्णव होरें जानकारी दिती ऐ जे रेलवे बजट च जम्मू-कश्मीर लेई इक जहार 86 करोड़ रपे दी रकम बक्ख रखी गेदी ऐ।
- जम्मू-कश्मीर विधान सभा च अज्ज उपराज्यपाल हुंदे सम्बोधन पर धन्नवाद प्रस्ताव पर चर्चा होग।
- मुखमंत्री उमर अब्दुल्ला होरें गणतंत्र दिवस परेड च जम्मू-कश्मीर दी झांकी गी दुई थाहर हासल होने पर संस्कृति विभाग गी ममारकबाद दिती ऐ।
- फौज दी व्हाईट नाइट कोर दे जी.ओ.सी होरें किश्तवाड़ जिले दा दौरा लाइयै- जारी कारवाइयें दी समीक्षा कीती- सैनिकें गी मता सौहगा-सतर्क रौहने लेई आखेया।
- उत्तर-रेलवे बत्ते फसे दे यात्रियें दे भारी रश गी दिक्खदे होई कटड़ा ते श्रीनगर बश्कार विशेष रेल गड़डियां चलाग।

<><><><><><>

## Railway JK Budget (Byte)

केन्द्री रेलवे मंत्री अश्विनी वैष्णव होरें कल सभ्भनैं डिविजनैं दे अधिकारियें कन्नै वीडियो कांफ्रेसिंग राएं गल्लबात कीती ते जारी बक्ख-बक्ख परियोजनाएं ते बजट प्राथमिकताएं दी समीक्षा कीती। स्हाड़े संवाददाता नैं जानकारी दिती ऐ जे गल्लबात दौरान मंत्री होरें दस्सेया जे रेल बजट च जम्मू-कश्मीर लेई इक जहार 86 करोड़ रपे दी रकम बक्ख रखी गेदी ऐ- जेहदा

इस्तमाल जम्मू-राजौरी रेल लाईन दे निर्माण ते विस्तार लेई कीता जाहग। उनें दस्सेया जे जम्मू-राजौरी रेल लाईन दी तफसीली प्रोजेक्ट रिपोर्ट तेजिया नै तयार कीती जा रदी ऐ- जिसलै जे बारामुला-उड़ी रेल लाईन दी प्रोजेक्ट रिपोर्ट पैहले गै तयार होई चुकी दी ऐ। मंत्री होरें तफसील च चर्चा कीती जे किस चाल्ली इनें प्रोजेक्टें गी भविष्य च तोड़ चाड़ेया जाहग। रेलमंत्री होरें आखेया.

<><><><><><>

#### Motion of Thanks

जम्मू-कश्मीर विधानसभा च अज्ज उपराज्यपाल हुंदे अभिभाषण च धन्नवाद प्रस्ताव पर चर्चा होग। इस बैहस च विधायकें गी सरकार दे नीतिगत एजेंडे ते विकास योजनाएं दे सरबंथे च उपराज्यपाल हुंदे सम्बोधन च दस्से गेदे मुद्दे पर चर्चा करने दा मौका थहोग। अज्जै थमां शुरू होआ रदी ऐ बैहस मुखमंत्री हुंदे जवाब कन्नै 5 फरवरी गी खत्म होग। एहदे तैहत 6 फरवरी गी सलाना बजट पेश कीते जाने कोला पैहले विधायी कम्मकाज लेई इक रुपरेखा तयार कीती जाग। ध्यानजोग ऐ जे माली बरे 2026-27आहला बजट मुखमंत्री उमर अब्दुल्ला हुंदे आसेया पेश कीता जाग।

<><><><><><>

#### Speaker House (Byte)

जम्मू-कश्मीर विधान सभा दे स्पीकर अब्दुल रहीम राथर होरें इस गल्लै पर जोर दिता ऐ जे बजट इजलास 2026 दौरान सार्थक नतीजे यकीनी बनाना सदन दी सांझी जिम्मेदारी ऐ। जंदे

रोज विधानसभा मिम्बरें गी सम्बोधित करदे होई स्पीकर होरें आखेया जे लोक सदस्यें कोला अपनी समस्याएं दे हल दी मेद करदे न। उनें विधायकें गी चेता नोआया जे विधायी कारवाई च सार्वजनिक संसाधनें दा निवेश कीता जंदा ऐ- उनें समें दा विवेकपूर्ण इस्तेमाल- गरिमापूर्ण बैहस ते आपसी सम्मान पर जोर दिता। स्पीकर होरें मिम्बरें गी भरोसा दोआया जे इजलास दौरान सब्बनें दी गल्ल गी बरोबरी कन्नै सुनेया जाग। उनें आखेया.

<><><><><><>

CM -Tableau

मुख्यमंत्री उमर अब्दुल्ला होरें गणतंत्र दिवस परेड-2026 च जम्मू-कश्मीर दी सांस्कृतिक झांकी गी दुई थाहर हासल होने पर संस्कृति मैहकमे गी ममारकबाद दिती ऐ। जम्मू-कश्मीर दी झांकी जिसी “लिविंग कैनवास” शीर्षक दिता गेदा हा- ओहदे च जम्मू-कश्मीर दी सदियें परानी कला संस्कृति- दस्तकारी ते लोक परम्पराएं दी झलक बड़ी गै आकर्षक ते शानदार ढंगे नै उजागर कीती गेदी ही। इस झांकी च जम्मू-कश्मीर दी संस्कृति दी पंछान- दस्तकारी दे प्रतीक प्रमुखता कन्नै कन्नै प्रदर्शित कीते गेदे हे।

<><><><><><>

Prog. Announcement

आकाशवाणी जम्मू दा क्षेत्रीय समाचार एकांश, औंदी 4 फरवरी गी दपैहरी साइडे 12 बजे कैंसर सरबन्धी अंतरराष्ट्री ध्याड़े दे उपलक्ष्य च 30एं मिटें दे इक बशेश कार्यक्रम दा प्रसारण करग जेदा विशेषार होग कैंसर, एहदे लक्षण, कारण ते इलाज। इस बशेश कार्यक्रम च स्हाड़ियां परौहिनियां होडन सरकारी मेडिकल कॉलेज जम्मू दे रेडिएशन ऑनकालजी विभाग दियां

असिस्टेंट प्रोफेसर डॉ. संदीप कौर जेहिड़ियां इस विशे पर अपने माहिरा बचार सांझे करडन। इस कार्यक्रम दी मेज़बानी साढ़े न्यूज़ एंकर जगमोहन शर्मा आसेआ कीती जाहग।

<><><><><><>

#### GOC Kishtwar Visit

फौज दी व्हाईट नाइट कोर दे जी.ओ.सी. लैफ्टिनेंट जनरल पी.के मिश्रा होरें कल किश्तवाड़ जिले दा दौरा लाया ते उत्थे तैनात सैनिकें गी 24 घैंटें मता सौहगा-सतर्क रौहने लेई आखेया। उन्दे कन्नै डेल्टा फोर्स दे जी.ओ.सी- ए.पी.एस. बाल बी गेदे हे। उंदा एह दौरा छात्रु दे जंगले च बर्फू कन्नै खटोए दे पहाड़ी इलाकें च छप्पे दे पाकिस्तान आधारित आतंकी संगठन जैश-ए-मोहम्मद दे आतंकवादियें गी तुप्पी कडइने लेई चलाए गेदे व्यापक अभियान दी पछोकड़ै च लाया गया- जित्थे उनें मजूदा हालात ते कारवाइयें लेई बंदोबस्तें दे बारे च बी जानकारी हासल कीती। इस इलाके च पिच्छले दंऊ हफ्ते दा अभियान जारी ऐ ते बिच-बिच बक्ख-बक्ख थाहरें आतंकवादियें कन्नै टाकरा ते दो तरफा गोलीबारी बी होई चुकी दी ऐ।

<><><><><><>

#### Special Trains (Byte)

खराब मौसम ते सिड़कें दे कन्नो-कन्नी ब्हाई डोआरियें दे प्रभावत होने करी श्री माता वैष्णो देवी कटरा ते श्रीनगर बश्कार यात्रियें दे भारी रश दे चलदे उत्तर रेलवे नै आरक्षित विशेष रेलगड्डियें गी चलाने दी मंजूरी देई दिती ऐ। साहड़े जिला संवाददाता नै जानकारी दिती ऐ जे चार विशेष रेलगड्डियां त्रै ते चार फरवरी गी कटरा ते श्रीनगर बश्कार चलगंन। एह रेलगड्डियां

अपने सफर दौरान बनिहाल च रुकगंन। इस पैहल दा मकसद फसे दे यात्रियें दी मदद करना ते नियमित परिवहन सेवाएं च विघ्न पौने दे चलदे आरक्षित ते सुविधाजनक यात्रा गी यकीनी बनाना ऐ। आकाशवाणी समाचार कन्नै गल्ल करदे होई कटरा रेलवे स्टेशन दे सुपरिटेंडेंट जुगल किशोर होरें आखेया.

<><><><><><>

Sampoornata Abhiyan (Byte)

जम्मू-कश्मीर च राष्ट्रव्यापी “सम्पूर्णता अभियान” दा दूआ गेड़ लागू कीता जा रदा ऐ- जेहदे तैहत केन्द्र शासित प्रदेश दे अकांक्षी जिलें च तरक्की-बाददे दे कम्में गी होर रफ्तार हासल होआ करदी ऐ। एह अभियान रियासी दे ठाकराकोट- पुंछ दे मनकोट- राजौरी दे रक्वास ते किश्तवाड़ दे मड़वाह ब्लाक च शुरु कीता गेदा ऐ- जेहदा मकसद 6 महत्वपूर्ण क्षेत्रें जिंदे च- सेहत- ढांचागत विकास- शिक्षा ते शासन बी शामिल न- च सम्पूर्णता हासल करना ऐ। इस अभियान दा लक्ष सेवाएं गी सखल्ले ते असरदार ढंगै सिर लोकें तगर पुजाना- लोकें दे जीवन स्तरै गी उबड़ा चुक्कना- कम्में दी प्रगति पर नेड़मी तक्क रखदे होई- इंदा समे-सिर तोड़ चढ़ना यकीनी बनाना ते इन्नै ब्लाकें दा पूरा-पराता विकास यकीनी बनाना ऐ। किश्तवाड़ दे जिला विकास कमीशनर पंकज कुमार शर्मा अभियान दे दुए गेड़ दी शुरुआत करदे मौके आखेया.....(बाईट)

<><><><><><>

Weather

मौसम विभाग नै अज्ज जम्मू-कश्मीर दे केंई इलाकें च हौली बरखा ते बर्फबारी दी पेशगोई कीती ऐ। कल थमां लेइयै 6 फरवरी तगर समूलचे केन्द्र शासित प्रदेश च मौसम आंशिक तौरा पर बदलोखड़ा बने रौहने दी संभावना ऐ। 7 फरवरी गी किश इलाकें च हौली बरखा जां बर्फबारी होने दे असार न- जिसलै के 8 फरवरी शा 10 फरवरी तगर आंशिक तौरा पर बदल छाए दे रौहने दी मेद ऐ।

<><><><><><>